



JULY 2024

VOLUME 64 | NO. 07

Khristian Thukizakna



EDITORIAL BOARD

Editor

Rev. Dr. S. Vung Minthang

Managing Editor

Rev. Thawndoulia

Contributing Editors

Rev. K. Kamchinkhup

Rev. Nenglian Vualnam

Production Managers

Rev. V. Thangkhanmuan

Upa T. Paukhansiam

Mr. Mangthianlal Samte

Circulation Manager

Upa K. Jamchinthang

Design & Setting

Upa Khuplajem Guite

CONTENTS

| | |
|---|------|
| 1. EDITORIAL | : 01 |
| 2. KHOTANG KIPUMKHAATNA | : 03 |
| 3. GBC DAY MESSAGE MUHKHOLHNA MASA KHENLAM AH | : 06 |
| 4. KIPAK KAWM A TOUPA NASEM | : 09 |
| 5. BIBLE STUDY | : 15 |
| 6. GAMMIAL AW | : 21 |
| 7. DORCAS CORNER | : 26 |
| 8. YOUTH CORNER | : 29 |
| 9. CHILDREN'S CORNER | : 31 |
| 10. EBC INNSUNG THU | : 33 |
| 11. ORDAIN SUNNA | : 38 |
| 12. KIPATHU GENNA LEH THUMNA DINGTE | : 39 |

LAKMAN:

| | |
|----------|----------|
| Kum khat | ₹ 150.00 |
| Dak ah | ₹ 200.00 |
| Bu khat | ₹ 15.00 |

Thusuah ding piakna:

Editor,
 Khristian Thukizakna
 Dorcas Hall, P. O. Box - 6,
 New Lamka,
 Manipur - 795006, India.

*Thusuah sung-a kigente
 Evangelical Baptist Convention
 Saptuam ngaihnan a hikim kholkei.
 Thusuahte'n amau thusuah ah moh a
 pawtek ding uh.*

KHOSUNG KIPUMKHATNA

“Pautheilou a ding in na kam ka in, sukawp a omni huchibangte tengteng thu ah. Na kam ka inla, diktak in vai hawm in, gentheite leh tasamte kiang ah vai hawmsak in” (Pau 31:8,9).

Buaina leh haksatna tampi kal ah kum kimkhat nanung zaw ah i dingtoui thei nawnta Toupa hon pipa kiang ah kipahtu i gen masa hi. Kha paisate ah tukum i thupi uh Pathian toh kipumkhatna, insung a zi leh pasal kipumkhatna, tate toh kipumkhatna, saptuam a kipumkhatna, chihte saoulou in article leh Bible studyte ah na simta uhi. Tukha i thupi ahileh khosung kipumkhatna chih ahi leuleu hi. Khenkhatte a dingin hiai khosung leh khotang tantan Bible in leng a gen khol a hia? chihtheih ding abang sim hi. I dawnna tuh Bible in gen lotham ahi chih ahi.

Amasa in, Pathian mite chi a i theih masak Israelte enleng, a khotang uh chidam a a kipumkhatna ding un insung kikep ding dan, insak inkhang kikal omdingdan, khotang a mihing hileh neih leh lam toh kisai diktatna kepbit dingdante apia hi. Tuata azuih ziaak mah un nam thupi a suak uhi. Kipumkhatna kichi amah a hong piang maww ahikei a, thilhoih bangzah hiam a kihih chianga a gah hong kilangkha tuh kipumkhatna ahi. Kipumkhatna tuh pak kilawmtak bang ahi, tua kipumkhatna a omna peuh ah thilhoih tampi a kimulou lam ah a kihih ta chihna ahi.

Kipumkhatna kichi mihingte muhsuah ahikeia Pathian dei leh lunglutna ahi. Khosung a mite vai itna toh diktat taka etkaisak ahilhi Chiang un mite lungmuang, khamuang, heutu zahtakhuai dan theisiam khua-le-tui hong suak ua kipumkhat himai uh ahi. Israel vaihawmte etkai ding Pathian thil tampi ana gen hi. Eite a dingin khosung a makai tuh Hausapa, VA, leh khotang makai dangte khawng ahi ding uhi. Tua hunlai a te tuhun a hibang geih a zuih lemtanglou pawl om mahleh a moral principle zuih kul veve lai hi. Bible sinsakna khenkhat etsakna din en zual leng:

1. Inkuan sung leh mihinpihte tung a hiamgamnate Pathian in koih maimailou (Eks 21:12-26).

2. Gante etkol ding: Bawngtal in mi silum taleh a thah ding ahi. Nidang a leng mi hihkha ngei apu in akeplouh ziak ahiehleh hinna tatna man apiak kul hi (Eks21”28-30).
3. Mi’n kokhuk tou in a sitlouh ziaikin ganta vakelum taleh kokhuk toupa’n aliau ding.
4. Mi khat in midang ganta gu in zuak hiam that hiam hitaleh bawngtal khat gun in bawngtal nga, belum khat gun in belum li in a din ding.
5. Khosung a meithai leh paneiloute hihgentheih ahieh ua, gensak ding omlou a Pathian a sap uleh Pathian kigolh ding hi (Eks 22:22,23).
6. Bawngtal hiam sabiltung hiam vakmang na muh khak leh aneitupa na melmate hihial mah lelung na vapiak ngeingei ding.
7. Nang hon homi sabiltung vanpuak lel a lampi apuk na muh leh na panpih ngeingei ding.
8. Mi khat bawntal in midang bawng si in sita leh a hinglai pen a neitupa’n a zuak ding a aman a kihawm ding uh.
9. Thuzuau na genzak louh ding ahi, gilou leh vaihawmna kaikawi dingin mitam lamlam zui ken (Eks 23: 1,2).
10. Golhgukna la ken, golh gukna in mit a tosak a, mi diktatte thu a kaikawi ahi (Eks 23:8).

Hiaite etsakna dia tamlou i taklat ahi, i gennop tuh i khosung leh khotang a kipumkhatna a om theihna dingin vai kizentak, leh diktat taka sai kul ahi chih ahi. Kipumkhatna in foundation a neih a kul, (kideihsakna, kimuanngamna, dika vaisaina [justice], lungmuanna, bitna) hiaite khosung a om chiangin kipumkhatna piangsak hi. Kisiamtan nilouh sang in i kipumkhatna ding suangphum (foundation) mimal ah, insung chiat ah, khosung ah i lep thak uh ngai hi. Khosung mipi lam ah hilou in khosung vaihawmte apan vaidik ahong kipat ngai ahi. Abulpi pen zaw Pathian laumi makai poimoh masa ahi. Makai Pathian ngai ngoih ngoih, Pathian tellou a bangmah lohchinglou ahi chih muchian, Pathian deihdan dinpih ngam makai i neih chiang in kipumkhatna hong pakkhe ta ding hi. ■

KHOTANG KIPUMKHATNA

- Rev Gin Malsawm, *Principal GBC*

T H U M A P I: Saptuam in tukum thupi 'Kipumkhatna' i nei a, i gentam in i gelh tamta uhi. Kipumkhatna deihlou mi tawm mahmah ding hi. Himahleh kipumkhatna ding in aman piak ngai in aman pengap leng kitawm ahimai diam, koilam peuh ah kipumkhatna sang in kiphelkhapna in masawn zaw abang hi. Huaiziaik in 'Kipumkhatna' gamgen lou in bulsut zek mah poimoh i sa hi.

H I L H C H E T N A: Kipumkhatna tuh khenkhiak theihlouw ding khop a kichimatna leh sakhat suahna ahi. Thil chituamtuam te'n akibatlouhnate uh koihkhia a, kipumkhat theihna di'a aman poimoh zahzah pengap a hong kigawmkhawm chiang un kipumkhat hongsuak uhi. Toupa Jesu hial in leng van laltutphah nusia a, mihingte hatlouhna leh haksatnate hong silh ngap in tatna nna hongsem a, Amah toh kipumkhat thei lel i hi (Phil. 2:7-8). Nupa hihna ding in nungak-tangval i hihnate nusia a nupi-papi di'a kipiak ngapna poimoh hi. Zi-le-pasal neikhin hinapi bangmah nutsiat neilou in i nolam ah khosa nilouh le'ng nupa kipumkhat ngeilou ding hi.

I B U A I N A: Gambuai ziaik leng ahi di'a, hun dang teng sang in tulai in khotang leh simleivai ah kipumkhatna poimoh kisa chiat in ki tangkou pih vengvung hi. Himahleh alamdang mahmah bel kuapeuh i hihna masa, pau-le-ham leh i min masate nuse ut omlou in i chituamnate kepbit teitei sawmchiat i bang maimah hi. Min thak phuak le'ng le i min masa mah chi tentun in, i pau leh laimal kibangloute mah kigen kulkul hi. Bang hiam program nei in koi hiam ah kisamkhawm in lampi tanpha zuikhawm hial le'ng le i kibatlouhnate mah taklang ut in ngawng a-ok supsup, bat duamduam zel i bang hi. Program khat a puandum ngong-oh kikhentuahna hon sai un kipumkhatna ding

lampi kawkkha i sa hi. I Toupa hihdan bang a eilam ah channgam i neih kei leh chu kipumkhatna i chih athu a genthoh tan a gahsuah ngeilou ding hi.

PU-PATE **LUNGPUT:**
Philosophers Plato leh Aristotle-te thugelhte diksa in “Mipite ahai tamzaw ahihman in mipi aw i chih mihaite aw ahi (Mobs are fool and the voice of the people is the voice of fool)” chih pompikhangthak tampi om in mipite aw bangmahlou a ngaihna hong uang mahmah hi. Mi khenkhat ngial mipi lang a pangngap in mahni kia a ding giugeu ngap leng omta hi.

I pu-pate’n bel kipumkhatna poimoh sa mahmah in “Ngiak tam lamlam hon zui un” chi in thugousiah hon nutsiat uhi. Amau chu tangpi mohsak leh etsan ding ana lau mahmah ua, khotang hamsia lohkhak ding kiveng mahmah uhi. Huaiziakin, khotang lampi, khotang tuinek leh khotang vante hoihtak in na kemit uhi. ‘Simbeng chiatchiat tangzang kibawl’ chi in Zawlbuk a giak te’n Val Upa nei in apil-asiam man hilou

in Val Upa ahihman in athuthu mang in avaihawm dandan zui ua kipumkhat in khua-le-tui humbit zou uhi. Thachial leh sabetna ah heutu ding kispin mapanna leh tangpanna ding tanpha amau deihtelna hilou in amaute ‘heutu’ thuthu mang ua lohching zel uhi. Zumun-samun ah leng ‘upa zaw’ mitmei veng in ama gamtatma kuamah gamtang ngam omlou ua, khosung kithutuak himai uhi. Inmun-loumun vai ah hausa upate vaihawm dandan phunlou in zui dipdip ua tagah-meithaite tanpha khaselou in kemkhawm thei uhi. “Luikhuk ah pagong leh inten-louten ah meithai masa” chi in deihsakna masa pia ua khotang kitungding uhi. Lungkimlouhna neite’n Hausa-Upa vaihawmte kiang ah thu tun ua athukhen dandan uh pom in vaihawmna sangzaw tun chih omlou uhi.

Honsuangtu i pu-pa te’n Pathian thu azakma ua pan in Laisiangthou sinsakna ana zui khin uhi. Tanchinhoih kum za val i kep nung in Laisiangthou thei mahmahta lah hinpihlou a miselna ding leh midangte

demna ding lel a zangkha i hih ding lahuai mahmah hi.

TOUPA LUNGSIM: Toupa hon thupiak chu ‘neih teng zuak a gentheite kiang a piak a Amah zuih ding’ ahi cf. Luke18:22. “Kuapeuh ahinna humbit ut in atan dia, ahin tan in ahumbit ding” chi hi (Luke 9:24). “Kikhenna ding leh kithupisakna zia in bangmah hih kei un; lungsim niamlak in michih in ama sang in midang hoih sa zaw hen. Michih in amah ading kia khual lou in midang ading leng ensam hen” (Phil. 2:3-4). “Na ki it uleh mi tengteng in Ka nungzuite na hi uh chih huai ah athei ding uh” (Jh. 13:35). Thupiak thupi pen tuh ‘Eimah ki-it sang a Pathian leh midangte itzawkna ahi. Huai in dan leh zawlneite thu tengteng a khaikhawm vek hi’(Matt. 22:36-40). I Toupa hon sinsak zaw eilam pang a bang hiam piakkhiak ding ahi.

KIVELNA DING: Za-a-za Khristian kichite insung, khotang, gam-le-nam, leh saptuam a i kipumkhat theihkei ua leh chu i Toupa honsinsakna zui khalou hi peuhmah ding i hi. I Pathian thu-awi dan leh Laisiangthou

pomdan kivelthak ngai ding hi. I thugen, vaihawm, laigelh leh thilhih khat peuhpeuh in mi akhenkhia hia agawmkhawm? chih kivelthak ding in i kikun hi. I gen ut – gelh utte i kibatna lam ahi hia, i kibatlouhna lam? Ei ngaihdan leh theihdan kia dik sa tinten a, midangte toh bangmah kikun theilou khop a dik kisa i hihleh a kisathei lua ki hikha zaw ding hi. Diklouhna nei ngei himhim lou i Toupa’n adikna thu gen lou in dai dide hi cf. Is. 53:7.

En hoihsa in ngaina tawk le’ng lekuahiam khat suliam ahi chih i theih nung a i sutzop teitei leh Khasiangthou pii hilou a samitna leh kisaktheihna in honpi ahi chih kiphawk ding ahi. “Toupa’n kisathei adou a kingainiamte bel hehpihna apenak hi” (Jak 4:6). Pathian toh i kidou leh bel avuallel ding sa i hi.

THUKHUPNA: I Pathian thu-awina niteng hinkhua a kilang in midangte toh khosakhawmthei i hih ding ahi. Huaiziakin, angmasialna apan midangte ma ding khualsakna lungput ahong let Chiang in khotang kipumkhat ding sa i hi. Kipumkhatna di’a aman piak ding om ahihman

in aman pengam i om zahzah kipumkhatna lam a kalsuan beh himai i hi. Kam a gengen a eimah deihdan chitentunte zaw kipumkhatna hilou in kiphelkhapna di'a panlate hi lel i hi. Ei lam a chan ngam a khotang kipumkhatna di'a kipengap ding in Toupa'n hon vualzawl hen.

“Tunglam a kipan pilna bel, atung in asiangthou phot a, huaikhit in kituah a ut a, anunnem a, achihnuam a, zahngaihna leh gahhoih in adim a, khentuam anei kei a, alepchiah kei hi. Huan diktatna gah zaw lemna bawlni in lemna a atuh ahi” (Jak. 3:17-18). ■

GBC Day Message

MUHKHOLHNA MASA KHENLAM AH

- Rev Gin Malsawm, *Principal, GBC*

GBC deihsaktute Saptuam neitu i Toupa Jesu Khrist min in chibai aw. Tutung in ‘Muhkhohlhna Masa Khenlam Ah’ chih thupi pansan in Pathian in College hon makaih dan leh dopsang dan tamlou enkhawm le i chi hi.

Kum 1981 a Grace Bible College kipatchil in ECC a semtu det 165 leh detlou 38 agawm in 203 om uhi. Amaute lak ah 10% kia in Laisiangthou sinna nei in 90% in Laisiangthou sinna neikha lou uhi. Semtute awlmohna ziaik in ECC Kumsim Khawmpi 32na, January 13-19, 1981 sung Dorcas Hall, New Lamka a kineih hun in KTP Central Board, Central School Committee, Standing Committee ECC, leh Karbi Anglong District te'n “Eipau a Bible School hon hi hen” chih

thu sung uhi. Hiai Khawmpi agenda 8na vote kila in thusun gumlou 81 om mahleh thusun gum 198 om in thusun puk hi.

Khawmpi in Bible School honna ding toh kisai Central School Committee mohpuakna apiak bang in Board of Directors, GBC-te panlakna in July 4, 1981 sunma dak 11:00 in Dorcas Hall, New Lamka ah Grace Bible College honkhiak ahi. GBC Genaral Body Meeting December 9, 1992 leh Board of Trustees, ECC thupukna 4na,

January 26, 1993 lemsakna bang in July 4 toh kinaihpén Pathianni 'GBC Sunday' chi a zat zel ding chih ahihbang in tukum in GBC Sunday July 7, 2024 ahi.

Grace Bible College akipatchil in Dorcas Hall ground floor ah room omte luah in, College van chih di om tuanlou ahihman in Dorcas Hall a vanzat omte kikoppih hi. Hiai hun in semtu thum – Principal, Office Assistant leh Grade-IV, kia in hunbit in sem ua, heutute 4 khawng in class note kibawltawm in office nasep toh thua in sinsakna pia uhi. College a graduate masapen ding in 1983 in CTh 1 leh GTh 5 in zoukhia uhi. Tuni tan in sintu 2105 in course tuamtuum zoukheta uhi.

ECC Kumsim Khawmpi 35na, 1984 thupukna 25na in GBC lohchinna ding in midang toh sepkhawm ding thupuk hi. Heutute'n hiai thupukna delhzui ua, Ministry of Home Affairs, GoI ah FCRA 1976 registration December 9, 1985 leh Registration of Societies (ACT XXI of 1860) ah January 22, 1986 in registration bawl ahi. Governing Committee 24th

Sitting, thupuk 2na, September 10, 1989 in ATA Accreditation nget ding, Section nih a khen in sappau leh eipau a sinsak in Bachelor of Theology Course pat ding thukim uhi. Kum 1996 in Master of Divinity course pat dinga thupuk ahihbang in tuni chiang in ATA Accreditation nei in English medium in Diploma in Theology, Bachelor of Theology leh Master of Divinity course-te sinsak in omta hi.

Heutu masate'n i Pathian lunglutna lam hon zuihpéh ahihman un, tuni chiang in GBC in heutu masate mengmuhna khenlam tungta hi a i theihman in Jehovah Pathian min phat in thupina Amah kia i pia hi. ECC a semtu mi 200 velte lungsim a nei in eipau a kisinsak ding a GBC patkhiak himahleh tuni chiang in India gam leh gamdang tanpha apan in Pathian Thu sin ding i College ah hong kuan ua, khovel mun tuamtuum ah Pathian nna semtheita uhi. Namtuam leh pau tuamtuum te'n hong zilkhawm ahihman un eipau kia a sinsaktheih hitalou in Sappau alou-theilou hong suak in, eipau in agalzilna Ministerial Training Course kia kisinsak in omta hi. Hiai

leng Toupa honpina khutma ahihman in Pathian min i phat hi.

A kipatchil in headquarters building leh stationaries-te kikoppih a kalsuan hamham himahleh tuni chiang in Toupa'n acre thum sang a lianzaw campus sung ah building thupi taktak toh hon thumta in, kumkhat a ding in sum vaibelsia a sim zeek in Pathian Thu sinsakna nna kisemtheita hi. College building-te mah pansan in college khawlsung teng hotdamna camp leh seminar neihna ding in kizang zel a, khamangthang tampi leh Toupa adi'a kisinsiamna mun leh kitunding thakna mun suak ahihman in manpha petmah hi. Hiai tan honpitu Pathian min phat in thupina Amah kia i pia hi.

College kipatchil in Saptuam mite itna thilpiak tamlou a kitoudelh nimnem himahleh Khasiangthou in Amite hon tokthou in eilak banah tuipi gal tanpha ah deihsaktu leh panpihtu ding tampi honpia hi. Tear Funds, David Hornberger ECCA te panpihna leh lehkhabu truck dim nih hial honpia

Edwin L. Hodge Ministries USA te min i genlou theikei hi. Gamdang apan mahni sum kisen a Guest Lecturer dia hong kuante ziakin leng Toupa min i phat hi.

Eilak ah leng sum-le-pai leh thumna tungtawn a phungvuhtu ding Toupa'n hon pia a thupi i sa mahmah hi. College in a poimoh mahmah Chapel, Prayer Hall, Holy Land Map-te mimal in hon bawlsak ua i kipak petmah hi. Tulel in Special Patron 209, Group Patron 132, Individual Patron 1531, Life Member 823, Memorial/Anniversary Gift 555, Annual Membership 44, avek a gawm 2476 leh khateng a Sintu Naupang Chawmtu 406 tak Toupan hon pia hi.

Toupa'n heutu masate muhkhawlina masa khenlam a honpita ahihman in Ahonpi zel sawm dan muchian thei ding in thumna tampi i poimoh hi. Ban ah, Toupa hon kawkmuhna lampi hi a i theihte zuizou ngei ding in tha-le-zung leh thilpiak tampi i poimoh lai hi.

GBC tup-le-ngim "Pathian min thupina ding a Khamangthangte it, sikha lungput nei, kingainiam

heutu sekkhiak a, a hinna uh khalam a piching, aginna ua Bible sinsak diktak zui leh a sepnamun mite tawndan toh kituak a nasep ding” chih taksuah zou ngei ding in hon thuum leh chih i thumna ahi. Tuchiang in i graduatete’n eilak a Saptuamte akep ban uah, gamdang leh missions field apan in sintu ding Toupa’n hon sawllut zel hi. Amaute’n azoh chiang un agam uh missions field-te ah amau pianpih pau zang in hiamtak in theihpihtu in pangzel uhi. Eite’n cross cultural missionaries sawl a tanchinhoih genna di’a amaute pau i zillai in, Toupa’n gammial apan cross cultural

student ding hon pia in azoh chiang un amau pianpih pau in tanchinhoih gen thei ua, Toupa honpi dan lamdang i sa mahmah hi.

Hiai tan honpi i Pathian in mailam ah leng hon pi ngei ding chih i muang hi. Muhkhawlna masa khenlam ah muhkhawlna thak leh sepsuah zohna hon piak ngei i lamen hi. Toupa hon lametna tan semsuaah zou ngei ding in theihtawpsuaah in kisukthak ni. College Toupa a’ ahi a, eite tungtawn a thil thupitak semkheta leh semkhe ut lai ahi chih phawk in, Toupa leh College ading in TAKKHEH chi in kisuk thak ni. Amen. ■

KIPAK KAWM A TOUPA NASEM

THUMASA: Khovel a mi enhuai pente tuh asepa bangbang ua lungkimte (Job satisfaction) hi un ka ngaihtuah hi. Tuabang bokin mi hehpihuai pente tuh kipak theiloute ahih uh gintak huai hi. Hichiin ka ngaihtuah a; Mihingte lungsim len (net) a khuh a, huikhawm theih hileh akhaikhawmtu dinga ka hisapna tuh, ‘vuina, lungkim louhna, kipahlouhna leh phunchiakna’ hiding in ka gingta hi. Setan in Toupa’ nasemte a sukbuai theihna dinga a Vanzat No-1 tuh ‘Kipahna lakmang sak’ hi dingin ka gingta hi. Melmapa’n lungkim lou a hon koihzoh ngeingei leh zaw Toupa nasepna ah na vuallel chihna ahi dinga, masawn lou pah ding na hi chih kiphawk a poimoh gige hi.

Sam gelhtu in angaih poimoh tuh 'Toupa pahtawiin nuam satakin kikou un. Kipak kawmin Toupa nasem unla; lasa kawmin a maah hongpai un' (Sam 100:1-2) chih ahi. Tuni'n Toupa gam nasem a kipak thei hetlou i om uhia? Toupa na semsem kawm a kipak a, kikou khe theilou setan kamhum i omkha uhia? Setan zoh thalna dinga poimoh masa pen zaw kipah ding hitop mai ahi. Setan in hehna leh vuina, khasiatnate zangin hon bei dia, hon zoh keileh nupa hinkhua bang, ta leh naute tungtawn leh adangdang zangin na kipahna lakmang tumzel ding hi. Huaiziakin, Toupa nasepna a bangziak a kipak ding ihia? Huan, bangchi kipah theih ding i hi uhiam? Chih i enkhawm ding uh:

TOUPA AH KIPAK UN: Inkuan khosa haksapi toh bangchi kipah theihding na chi hia? Kipahna i zondan leh i position lakdan dik zoulou omkha thei ahi. Tuniin inkuan ah kipak un hon chileh inkuan tampi ah kipahna a om keiding hi. Na zi ah hiam, na pasal ah hiam, na tate ah hiam kipak un a chikei a 'Toupa ah kipak un, ka chinawn ding hi. Kipak un' (Phi 4:4) achizaw ahi. Toupa ah achih

chitchiatna tuh a poimohna tak ahi. Pathian in mizat ding tampi aneihlai a nang leh kei tektek zatkhak a i om khawng, kipahhuailua ahikei maw! BYF hiama kizang a, Local committee hiama kizang a, dorcas makai hiam a kizang zang kawma kipak theilou, kei zaw inkuan sung buai toh chichi mi na hihleh zaw 'Na kipahna Toupa ah, ahi kha kei a ahikha ding hi' chih kivel hun ahi. Jawlnei Habakuk in 'Toupa ah ka kipak dinga, ka hotdamna Pathian ah ka nuam ding hi' (Hab 3:18) achih bangin. Haksatna tawp hun ah leng Toupa ah, i hotdamna Pathian ah ahih gige ding ahi. Habakuk kipahna thuguk tuh theipi gahtam hiam, Oliv uain tam leh tawm hiam, Grep pallunte hiam himai louin. Toupa hotdamna Pathian ah chih ahizaw hi.

Toupa a kipahna zongloute adin kipaktak a Toupa nasep a haksa ahi. Mun khenkhat ah kei hunsung a ki leikhia, kei hunsunga kibawl khia chihleh, founder chairman chih khawngte ah kipahna ding kizong kha sek hi. Historical point of view ah tuate poimoh lawtel mahleh, Toupa a kipahna taktak toh semten zaw a mau

min lohkhak chitchiat louh hun inleng kipaktakin a pangzel uhi. Pathian nasemte a dingin mihing lamah 'spiritual pride' neih baihlam petmah hi. Pulpit tang apan i kumkhe suka, na thugen a nuam lua, a manpha lua chia chibai toh hon delh om hun chiangin ei hihtheih kisakna lian baih petmah hi. Toupa phatna lasa a na din inleng mi'n na siamlua honchih khak kei uleh leng, a nna neitu Toupa kipahna sem na hi chih phawkzel in. Luka bung 15 ah Tapa taimangpa' U-tanchin i theichiat uh hi. A tomlam a genin a insung uh a lut nuamkei hi. Apa kiangah 'kum hiai tan nana sem ing a, Na thu a talek ngeilou ing a, ka lawmte toh nawpbawl na ding kelnou khat leng nonpe ngeikei' (Lk 15:29) chiin, Adikna leh khasiatna 'brash' khe ziahziah mahleh. A taktak in zaw 'Christ-Center ministry' hilou in, 'Self-Center ministry' ah ana tangkha hizaw hi. Sam gelhtu in 'a kipahna tuh Toupa dan ah ahizaw' (Sam 1:1) chih toh kigamla mahmah kha ding hi. Unau it aw, kipak kawma Toupa na sep theihna ding zaw 'Toupa ah' chih ahiah gige ding ahi. Huchi ahiehleh bangziak a Laisiangthou in

kipak tak a Toupa na semdia hon deih ahia?

VAN A NA MIN UH GELH AHIH

ZIAKIN: Setan in a tup masak pen tuh kipahna lakmang ahi ichita uh. Kipak lou leh khase kawmkawm a omna in 'Nuam satakin hon kikou sak theita kei hi' (Sam 100:1) Khovel a om ihih ziaakin hichiin i gen ding uh: khovel etdan ah zaw power sangtak toh nasep kichi a nuam in a kipahhuai mahmah ahikha ding hi. Minister leh MLA te D.O letter toh thil na sai kha ngeita hia? Tua D. O letter a 'My dear....so and so' chih a muh uham, 'Your's Faithfully' nuai a signature amuh chiangun 'attention' pia in a semlou theikei uh. Sepsak a omten leng kipak in report a bawl zel bangun, Toupa Jesun nungzui 70 a sawlkhiakte 'kipak takin a hong kikhawn ua, Toupa aw, dawite nangawn na min in ka thuthu un a om uh' chiin ministry report a pia uhi. Himahleh Jesu tuh Jesu ahiah manin a lamet uh a bangta kei hi. Aman 'Khophia bang a setan van apan hong kia ka mu ahi. Ngai un, gulte, aikamte, melma thilhih theihna tengteng tunga thuneihna konpia ahi. Himahleh dawite na thuthu ua

a om ziaak un kipak kei unla; *Van a na min uh gelh ahiah ziaakin kipak zaw un*(Lk 10: 18-20) achi daihmai ahi.

Kipak kawma Toupa na i sepna ding ziaak tuh dinmun ziaak ahikei a, thil lamdangte leh, dawih leh kaute hawlkhiaak ziaak leng hilou. Khaloh tam ziaakleng hi masa louin (tuatete dem hipah lou i hi). 'Van a min gelh a omziaak in' achizaw hi. A kipahhuai mahmah tuh 'dawi leh kau delh khiakziaak in hiam, miracles ziaak in hiam' chita leh, kipak ngeilou ding tampi ki omkha ding hi. Himahleh, tunglam a min gelh a om tampite tuabang thil lamdang a thop (equipped) louh om thei veve hi. Khalam thilpiak don tam leh tawm thu ahikei chih i thei hi. 'I khoveng hihna uh van ah ahi zaw' (Phi 3:20) chih ahi. Bangmah in hon suksiat sak theihlouh tunglam a min gelha om thupi hina maizen hang e maw! Tua ahiah manin, kipak kawmin Toupa na i sem ding uh aw.

VAN AH NA KIPAHMAN UH A THUPI NGAL A: Mathai 5:12 ah 'Kipak unla, nakpi tak in nuam un: Van ah na kipahman uh a thupi ngal a' achi hi. Na

kipah man uh omzek ahichilou in, a thupi achi ahi. Hiai thu kipahhuai kei gen ahikei a, i upate hiam, i pastorpa hiam in a genleng ahikei. Himahleh Toupa Jesu mahmah in agen ahi. Den a i gen gamhuai lamlam nawhkhiaak thu ahikei a, Dhemaji field hiam a va kuan sese a kipah ding ahikei a. 'Van ah na kipahman a thupi ngal a' chih tuh kipak kawma i sepna ding santak ahi. Tunin' gingtute i thupina leh hamphat mahmah na uh hiai ahi, khovel miten a neihlouh uh nang leh kei ading in kipahman van ah, koihkhoh in a om ahi. Paul in khalam ginna mit toh muchiang lua ahiah manin 'Tun zaw lallukhu setheilou kei adia koihkhoh in a omta.' (2 Tim 4:8) achih ahi.

Smarna saptuamte bishop, Polycarp kichipa martar dan ka ngaihtuah khasek hi. Roman kumpi Domitian tuh hong ki pathian bawlin, mipi biak dingin amah lim hon tungkheta hi. Tua milim be utloute sahang kulh apaih leh namsau a kiva lupsak khawng in gawtzeh uhi. Huchih lain Polycarp in 'vision' lamdang tak muin alukham (pillow) tuh meiin akangta luahluah mai a, a maban zeka hallup ahiding hilhkhohna

in a ngaimai hi. Sepaihten kum 86 a upa Polycarp tuh a man ua, deihtel ding pia in 'Denying faith or be killed' chih ahita. Himahleh, Polycarp in "I have been served him for 86 yrs; and he has done me nothing wrong. *"How can i blaspheme my king and my savior"* achita hi. 'Chance' pe thakzel mahle uh a ginna a tawpsan utkei a, Meikuang satak sungah a pailut ua, midang mei a hallup toh a kilamdanna tuh 'Not like flesh burnt; but baked bread-sweet smell and frankincense' chiin gen uhi. Mihing kihal gim namlou in perfume namtui bangmai a namkhia chih hita zen hi. 'Sihpha in ginom in, huchiin hinna lallukhu konpe ding' (Kil 2:10) chih ahi. Leitung ah gimnate, thuaknate leh haksatna tuak mahle uh, van a kipahman san ding muchianten zaw, kipaktak in Toupa na asemzel uhi.

THUKHITNA: Kipak kawm a Toupa nasem dia sap chihthu i kikuplai un, Kipak kawm a Toupa nasepna ding ziakleng i gentel uhi. Mission school a ka zilkhak. Alliene Vale Chorus gelh 'The joy of the Lord is my strength' chih lungsim ah hong kilang zel hi. Huai tuh Nehemia

in 'Dah kei unla; Toupa a kipahna na hatna uh ahi' (Neh 8:10) achih apan laksawn ahi. Nehemia hun in Israelte tuh kipahna boruak ah aomkei hial uh chih i thei hi. Himahleh, Nehemia in 'Toupa a kipah topna tuh hatna ahi' chiin tha hat suahting in fuihna thuchah abawl ahi. Gen taksa bangin setan 'plan No-1' tuh kipah louh sak teitei ahi. Setan zohna ding leh Toupa lalgam keklet zel ahih theihna ding tuh 'Kipah ding' chih ahitopmai hi. Na kipah kei a, na khasiat a, na vuidet leh zaw setan in nanga lalgam keklian ahi zaw ding ahi.

Kipah suk topmai tuh setan inleng loh ngaihna theilou hi, melma zohna vanzat hoih pen tuh kipahna ahih ziakin. Na kipah deuhdeuh leh na melma, nang hon hawte adah deuhdeuh ding uhi. Setan in Job lam chiteng a beiin a soal hi, a tapa-7 leh tanu-3 te banah, a neih alam tengteng ni khat thuin a lakmang sakvek chih i thei hi. Setan thiltup tak zaw; 'Job kipahna lakmangsak ding, Pathian gensiat sak' ahi. Himahleh, Job in 'Toupan a pia a, Toupan a la mangta; Toupa min phat in om hen' (Job 1:21) achih thu kimudaih hi. Setan in

a zoukei nasa tel mai hilou hia! Job hinkhua tuh adelhzui zel a, a taksa tungah meima zangin adelh zuizel hi. Kam-uang deuh in genleng Job taksa tuh a hatu (teeth) chihlough peuhmah meima a dimsuak ahi khamoh kei ding hi. Setan in Job tuh a zi tanpha zangin bei zuizel mahleh azou tuankei hi. 'Pathian apan hoih i mudia, hoihlou le i mu kei dia' (Job 2:10) achi hiuhiau

mai hi. Hiai kidouna phualah Job in 'Championship' hihna la in, 'trophy' deih huaitak dawmsangtu asuak ta hi. Lungkia in na om hiam, haksat nate' kaihkun in na om hiam? Na min vanah gelhin a om a, van ah kipahman in hon ngak hi. Toupa a lungdamna tuh tha hatna thuguk ahi chih phawk thak in aw. Toupan hon vualzawl hen. Amen ■

BAPTIST WORLD ALLIANCE OFFICERS (2020-2025)TE

- | | |
|---|--|
| ✓ TOMÁS MACKEY <i>President</i> | ✓ NOEMÍ JANSON LIDAK <i>Vice President (Colombia)</i> |
| ✓ KARL JOHNSON <i>First Vice President</i> | ✓ DAVE KWOK <i>Vice President (Hong Kong)</i> |
| ✓ CAROLYN FOSSEN <i>Treasurer</i> | ✓ JENNIFER LAU <i>Vice President (Canada)</i> |
| ✓ SAMSON AYOKUNLE <i>Vice President (Nigeria)</i> | ✓ ELIZABETH MVULA <i>Vice President (Malawi)</i> |
| ✓ FERNANDO MACEDO BRANDÃO <i>Vice President (Brazil)</i> | ✓ ALBERT REYES <i>Vice President (USA)</i> |
| ✓ OTNIEL IOAN BUNACIU <i>Vice President (Romania)</i> | ✓ LINA SAWAN <i>Vice President (Lebanon)</i> |
| ✓ JOEL DORSINVILLE <i>Vice President (Haiti)</i> | ✓ RACHAEL TAN <i>Vice President (Taiwan)</i> |
| ✓ JOHN HICKEY <i>Vice President (Australia)</i> | ✓ SAMUEL TOLBERT, JR. <i>Vice President (USA)</i> |
| | ✓ ELIJAH WANJE <i>Vice President (Kenya)</i> |

BWA TEAM TE

- | | |
|--|--|
| ✓ Elijah Brown <i>General Secretary</i> | ✓ Carolina Mangieri <i>Director of Global Events and Fellowship</i> |
| ✓ Jeff Carter <i>Director, Horizons Leadership Training</i> | ✓ Shirley Porto <i>Global Partnership Associate</i> |
| ✓ Mike Delorme <i>Building Services Specialist</i> | ✓ Marsha Scipio <i>Director of Baptist World Aid</i> |
| ✓ Everton Jackson <i>Director of Integral Mission</i> | ✓ Lee Spitzer <i>Historian</i> |
| ✓ Merritt Johnston <i>Director of Communications & Media BWA Women Executive Director</i> | ✓ Jenny Stewart <i>COO & Director of Ministries</i> |
| ✓ Julie Justus <i>Director of Global Partnerships and Unity</i> | ✓ Monica Teal <i>Director of Finance</i> |

BAPTIST WORLD CONGRESS
JULY 7-12, 2025 BRISBANE,
AUSTRALIA ah om ding

Thupi: "LIVING THE GOOD NEWS"
Luke 4:18-19

BIBLE STUDY



Pastor Khamkhanchin Ngaihte, Local Pastor, EBCC Zion

Text : Ephesate 2:11-22

Thupi : Khrist a Khat: Judate leh Zentelte

Thumasa: June kha a i sinna (Eph 2:1-10) ah Jesu Khrist a hinna thak tawh kisai Paul in saptuamte a sinsakna ina sinkhawmta uhi. Khrist a hinna thak i gen chiang in gingtute hinkhua masa (Gingtu hihma) leh gingu hihnung tulel hinkhua i genna ahi. Huai mah tuh Paul in leng ana sinsak ahi. Tu kha in Ephesate 2:11-22 sung apan in Jesu Khrist a hinna thak in a tut kipumkhatna leh a gah I sinkhawm nawn ding uh. Hiai sung ah Paul in gingu hihna in niteng hinkhua a a gahsuah ding hon taklang hi.

2:11-12. Zentelte Dinmun leh Hihna masa *“Huaiziak in tuma lam a nou taksa a Zentelte, taksa khut a zeksum a chihte un zeksumlough hon chihte uh na hi uhi. Huai lai in, Khrist lou in Israelte khua leh tui kimi dang in khovel ah lam-etna neilou leh Pathian lou a om in, thuchiam thukhun lak ah mikhual in na om uh chih thei gige un.”*

Zentelte'n ginna ziak a Khrist a hinna leh hihna/dinmun thak a tan uh a theihiam sem ding uh deihna Paul in a hinkhua/dinmun masa uh a genpih phot zawzen hi. Laphuaktu in, Toupa ziak a i hamphatna gen ut a “tuan a simthu suut

leng maw, tual i niam simthu” chi a ahon pat bang deuh ahi. “Zek sumlough” kichite tuh Juda sahkua dan in Pathian dan pawlam a omte genna ahi a, hiai i text ah Zentelte genna ahi. Gingu ahihna ua a dinmun uh hehpihhuai leh lam-et bei ahihdan thei gige ding in Paul in hasuan hi. Bangziak in, Khrist a a dinmun thak uh a theihiam ua, akipahpih theihna ding un. Mikhial hihdan kitheihchetna in hotdamna manphatna leh a hamphathuaina hon theitel sak hi. Gingu ahihna ua Zentelte hihna khenkhat – Khrist neilou, zeksum louh (Pathian' Dan pua a om), Israel khua leh tui hilou,

lam-etna bei, Pathian thukhun in a huam khaklouhte ahi. Dinmun setak leh beidothuai tak ahi.

2:13 Khrist Sisan Ziak a Dinmun Kikhek *“Tu’n bel, Khrist Jesu ah nou nidanglai a gamlapi a omte, Khrist sisan a hihnai in na hong omta uhi.”*

“Tu’n bel” (but now) thumal in Zentelte hinkhua leh dinmun a kikhekna om hon taklang hi. Hiai kikhekna tuh- nidang a mikhual bang a gamla pi a ana om himahle uh tu in tuh “hihnai in na hong omta uh,” “Pathian in Jesu Khrist ah amah tawh hon ki naisak ta hi,” (BI) chiin a gen hi. English ah “brought near” achi. Pathian tawh akinaih theihna ding ua Jesu Khrist sisan a leikhiak a om ahih uh genna ahi. Dinmun kikhekna gen ahi a, huai kikhekna (hihnai a omna) dia vanzat tuh “Khrist sisan” ahi. Khrist sisan zia mah in khelhnate ngaihdamna i tangta chiin Paul in ana genkhin ta hi (Eph 1:7). Paul mah in, “man piak a leisa na hi uh” chiin gingtute ana hilh hi (1 Kor 6:20).

2:14. Amah iki Lemna ahi.
“Amah i kilemna ahi; ama’n

ei nihte khat a siam in i kikal a kimelmakna baanglai ahih chimta hi.”

“Amah i kilemna ahi” chih a “amah” kichi Jesu Khrist genna ahi. Jesu Khrist tungtawn in Pathian leh mihing kal ah kilemna a om a, tua kia hilou in, mihing leh mihing kal ah leng kilemna a om thei hi. “Ei nihte khat a siam in” chih in abiik a Zentel namte leh Juda namte kal a Khrist tungtawn a kilemna/khat suahna genna ahi. “Kimelmakna baanglai” chih in, Dan zia mah Judate leh Zentelte kal a lungsim leh niteng khosakna a kikhenna, kimeelmakna, amaute khentu genna ahi. Khros a Jesu Khrist thuakna zia kin mihing leh Pathian kal ah kilemna hong om a, tua in mihing leh mihing kala kilemna hon tun ahi. Hiai mah ahi Paul in a gennop. Tulai a i lak a kilemlouhna om gigte khawng ngaihtuah thak le Pathian tawh i kilemlouh zia mah hikha ding hiveh aw! Mihing leh mihing kal kia a buaina dan in i ngaihtuah kha nak ua hiven. Paul in, a tung zawng a kilemna (Pathian tawh kilemna) in a pheizawng (mihinpihte tawh kilemna) a lemna tun teitei ahi achi.

2:15-16. Dan Thupiakte hihmanna in a tup *“Thusehte leh dan thupiakte a sa a hihmang in; huchia nihte amah a mihing thak khat a siam a kilemna a bawl theihna ding in. Huan Kros ziak a nihte pumpi khat a Pathian toh hon kilemsakna ding in kimelmakna a hihbei ta hi.”*

Hiai ah Paul in, Mosi Dan hihmang/nasem theilou a koihna in a tup poimawh mahmah nihongen hi. Khatna ah, Khrist a mihing thak khat siam ding ahi. Kros a a sihna tungtawn in Khrist in Zentel namte leh Juda namte apan mihing thak (new humanity) khat hon siam khia hi. Huaituh, Zentelte Juda hong suak hiam, Judate Zentel hong suak hilou in, huaite gel kigawm a mihing thak “pumpi khat” hong piang ahi zaw. Juda zeksumte leh Zentel zek sumlouhte Jesu Khrist ah pumkhat hong suak uh ahi. Huai tuh saptuam (new identity) ichih ahi.

Anihna ah, Zentelte leh Judate Pathian tawh kilemna ding ahi. Hiai minam nihte Pathian tawh ahong kilem Chiang un amaute gel kal ah lemna om in pumkhat hong suak

uh ahi. Khrist in Kros a a sa mahmah a ahong thuakna in dan thupiakte thilhihtheihna beisak in nasem theilou in koih hi. Jesu Khrist ahong kilatchiang in Mosi tungtawn a dan piak a om pen a hun bei, zat nawnlouh, hiam zat theihlouh (inoperative) hong hi ta a, dan pansan a siamtanna hinawnlou in ginna tungtawn a siam tanna ahita a, huchiin Judate leh Zentelte leng dan tellou in ginna tungtawn in pumpi khat hong suak uhi.

2:17-18. Kilemna Tanchinhoih *“Huan amah ahong pai in, nou gamlapi a omte kiang ah leh naichik a omte kiang ah leng lemna tanchinhoih a hilh sam hi. Amah ziak in Kha khat a Pa kiang lut theihna I nei tuaktuak uhi.”*

Tang 17na ah, Paul in Khrist in a sihma hiin a thawhnawn nung hileh a nasep thupi pen (a message thupipen) “kilemna” or “muanna” (peace) ahi chih a taklang hi. Tang 17 a thute Isai 52:7 leh Isai 57:19 apan lakkhiak hiding ahi. Tang 14 ah leng “amah i kilemna ahi” ana chi khinta hi. “Lemna tanchinhoih a hilh” chih pen “Lemna tanchinhoih a puangzak/a gen

(proclaimed/preached) chihna ahi a, thugen tangpi hilou in thuneihna tawh thugen ahi chiin Hoehner in a hihchian hi. “Nou gamlapi a omte” chih in Zentel minamte, nidang a gamlapi a om, ahihhang a Jesu Khrist sisan ziak a hihnai a omte genna ahi. “Gamla pi a om” chih in Zentel namte nidang a Pathian Thukhun pawlam a om or Pathian Thukhun in huam khalou bang a ngaih ahihna uh genna ahi. “Naichik a omte” chih in Juda gingtute a kaw k thei hi. Khrist in Kros a a nasepna in Pathian tawh kilemna hon tun a, tuaziak mah in mihingte kal ah kilemna hong om hi. Jesu Khrist i kilemna ahihkia hilou in hiai kilemna thu pawpa or phuangu tu ahi hi.

Tang 18na ah Paul in kilemna thu puanzakna in a hon tut a hon gen tuh “Pa kiang nai theihna” (access) ahi. Jesu Khrist in Kros a anasepna tungtawn in Judate leh Zentel te’n Pathian tawh kilemna a nei tuak ua, tua gah in amaute nih kal ah kilemtuahna a om thei hi. Tua in a piak hamphatna khat tuh kilemna ziak in anih tuaktuak un Pa kiang nai theihna a nei

tuaktuak uhi. “Kha khat a Pa kiang luttheihna” chih in huai “kha khat” pen Pa kiang lut or naihna dia a vanzat ahihna a gen hi. Korin gingtute kiang ah Paul in, “Kha khat in pumpi khat ah ahon baptis lut...” chi a ana gen (1 Korinth 12:13) tawh kinai hi. Hiai a “Kha khat” thumal in kipumkhatna a kaw k ban ah Ephesate a Pathian a mi thumte (trinity) nasep genna leng a kaw k hi (Eph 1:4-14). Pathian leh mihing kilemna ding nasep Pa, Tapa, leh Khasiangthou kihelna nasep ahi chih a Chiang hi.

*2:19-22. Kipumkhatna Gahsua h
2:19. “Huchi in tu’n zaw zin
leh leng na hi nawnta kei ua,
misiangthoute tawh tualsung
khat leh Pathian inkuanpihte
na hita uhi.”*

Kilemna tanchinhoih in kipumkhatna hon tun ahihman in, tua kipumkhatna gahsua h hiai ah Paul in hon gen in “huchi in” chiin a hon pan hi. Kipumkhatna gahsua h a Zentel gingtute hihlouna (negative) leh hihna (positive) Paul in a hon gen te - “zin leh leng na hi nawnta kei ua” achi ban ah, “misiangthoute toh tualsung khat” leh “Pathian’ Inkuan

pihte,” chih ahi. Zentelte dinmun masa bung 2:12 a kigente kilehbulh in, tu in, misiangthoute toh khua leh tui khat, inkuan khat suakta uh ahi. Hiai a “misiangthoute” chih gingtute genna ahi. Gingtu hong suak Judate leh Zentelte genkhawmna dia kizang thumal ahi. Zentel Khristian hiam Juda Khristian hiam hilou in, hihna thak “Pathian’ Inkuan’ hong hita uh ahi. Gingtu hihna in minam hihna khup (transcend) ahi.

2:20-21 “Khrist Jesu ngei a ning a suang kiphawmawh pen hi in, sawltakte leh zawlneite suangphum tung a lam na hia ua, amah ah suanglep tuam chiat kituaktak a suktuah, Toupa ah temple siangthou a suak hi.”

Gingtute’n a gintak dakkal un a minam hihna uh khenlam ah Jesu Khrist a kifulphuh Pathian’ Inkuan’ hong suak uhi. “A ning a suang” kichi inn lamna dia a poimawh pen, a building pumpi kingaktuahna ahi a, huai tuh Jesu Khrist ahi (cf. Isai 28:16). Pathian Inkuan ah Jesu Khrist tua akifulphuhna ahi a, amah ah kahiang chiteng kituaktak a

leptouh in a om hi. “Sawltakte leh Zawlneite suangphum tung a lam” chih in ginna ziaak a minam thak (new community) hong piang kingakna, a suangphum or a tawphah tuh Sawltakte leh Zawlneite leh amau thugente leh sinsaknate genna ahi ding (1 Kor 12:28). Hiai minam thak tuh “Toupa ah Temple siangthou a suak” chih ahi. Paul in Jerusalem Temple mitkha a mu kawm a hiai “temple siangthou” chih thumal hon zang hiding a gintak ahi. Paul in a gennop bel hiai kipumkhatna ziaak a minam thak, Pathian’ Inkuan’ hong piang tuh siangthouna lam manawh in a khangtouna ahi chi ahi. Khristian khanna in a tup tuh Khrist batsemna (siangthouna) ahi. Hiai a minam thak khat hong piang tuh Thukhun Thak a saptuamte genna ahi.


2:22. “Amah ngei ah nou leng, Kha a Pathian tenna ding a lepkhawm na hi uhi.”

Khrist a khat suahna (kipumkhatna) pianzia a suut zawh in Paul in hiai ah kipumkhatna in a tup khat hon taklat behlap hi. Huai tuh, Zentelte ginna tungtawn a

Khrist tawh pumkhat suak in, Pathian tenna hiding a Khrist pumpi a laklut hita uh ahi chih ahi. Judate leh Zentelte ginna tungtawn in Khrist pumpi (saptuam) ah laklut khawm in om uhi. Huai saptuam ah Kha in Pathian alak uah a teng hi. Pathian tenna (saptuam) hiding, siangthouna a khang ding a leptouh ahi uhi. Thukhun Lui hun in khut a lam temple ah Pathian teng hi (Isai 6:1; Ezek 43:5). Thukhun Thak hun in, gingtute lak ah Pathian teng a, Thukhun Lui hun sang in Thukhun Thak hun in Pathian a mite tawh kinai zaw hi chih hon theisak hi. Thukhun Thak ah Pathian' Kha in a mite tenkhum (indwell) hi (1 Kor 3:16-17; 2 Kor 6:16). Ginna a Jesu Khrist hondampa ding a i san chiang in, i san dakkal in Pathian' Kha in (Pathian mah) hon luah ngal hi. Huaiziak in, i Khristian hinkhua i kivelchet a, ei utna dan lel a Khristian hi theilou ihi chih theihgige ding ahi.

Thukhupna: Zentelte leh Judate sadan leh tawndan ah mituam, zattuam, kigamlapi ahi uhi. Himahleh, Jesu Khrist tatna tungtawn in huangsung khat ah, Pathian' inkuan a laklut a om in, khalam inkuan, minam thak hong suak uhi. Hiai kipumkhatna tuh Jesu Khrist tawh kipumkhatna gah ahi. Gingtute Jesu Khrist suangphum tung a niteng a amah batna a khang tou zel ding a lepkhawm ihi uhi. Minam hihna (ethnic identity) sang in gingtu i hihna a thupi zaw hi. Tulai khovel ah bel, i minam hihna khekkhe ding omlou hileh kilawm hial in i minam hihna uh i tawisang uhi. Himahleh, a diktak in, Khristian ihihna sang a manpha zaw, thupi zaw, hon gawmkhawm zou zaw ding bangmah dang omlou ahi. Zentel gingtuten hiai thu a theih ding uh a poimawh zahzah in tulai gingtute'n leng i theihshiam a poimawh takzet hi. ■

Local Saptuam a zat ding **Kitenna Certificate tuamna** leh Pastor Gown a **Pastor's insert tap collars** deihten COVENTION BOOK HOUSE ah muhtheih ding hi.



Pastor's insert tap collars



Kitenna Certificate tuamna



Gammial Aw

Tangthupha tangkoupih theilai ding a hunhoih leh manpha hon pia i biak Pathian min in Gammial Aw simtu tengteng itna chibai aw. Khamangthang dingte itna ziak a saptuam mite amaute a ding a thilpiak leh thumna a i na pannate Toupa'n hon vuaksuaksaklou a, khateng a semtute sepna tungtawn a Jesu Khrist hondampa ding a sangthak, baptisna tangthak leh gingtute lak a thilpiak a pangthak ding hong omzelte ziak in kipahhuai i sa mahmah hi. Field a semtute'n gahsuah leh lamzang a hon septheihna ding un saptuam mite'n thilpiak leh thumna a naksem a i napan poimoh ahihdan hon musak hi. Tua ahihman in, semtute'n Pathian apan pilna leh A khasiangthou thopna tang a hon sepzom zel theihna ding un thumpih zel ni. Toupa'n field a semtute apan sepna tungtawn a gah hon piaknawn hiai anuai ate enkhawm ni.

A. HIMALAYAN MISSIONS FIELD

KIPATHU GENNA LEH THUMNA DINGTE:

1. Toupa'n field a semtute sepna tungtawn in gingthak Birgunj ah 01, Jorethang ah 03 leh Kirtipur ah 03 hon penawn hi. Birtamode saptuam apan in leng mi sawm-le-khatte'n baptisna tang uhi. Kipathu gen in, ginna a hong dinkipna ding un thumpih ni. Toupa'n Field a i sepna hon vuaksuak saklou a, a hunhun a gah muhtheih ding hon piak zelte ziak in kipathu gen ni.
2. NEBC in kumteng a a neihzel Basic Bible School a 9veina May 13- 23, 2024 sung NEBC Faklung ah buaina omlou a lamzangtak in zangzou uhi. Kipathu gen in, hiai hun a sinsaktute'n sinsakna a piak khiakte uh a tel mite'n a hamphatpih chiat ngei uh i lamen hi.
3. Himalayan Missions Field (NEBC, Central Nepal, West Bengal & Sikkim) sung ah Biakin 28 leh Fellowship-29 omlel

- hi. Field sung a saptuamte leh semtute khalam leh salam a khanhoih a hong khanna ding un thumpih ni.
4. Sawltak mi 4te'n Field Exposure May khasung Nepal singtang bialte ah buaina bangmah omlou a zangzou thei ahihna uah kipahtu gen ni. Amaute'n, field exposure a neih hun sung ua amuh leh a sinte uh tunung a saptuamte lak a manphatak a hon zatkhiak theihna ding un thumna in delhzui ni.
 5. Gingthak leh Baptisna tangthakte khalam kalsuanna ding uh Khasiangthou pina leh makaihna ngetpih ni. Amaute ginna a hong kip semsem ua, khovel thilte a kaihbuai a hihlouna ding un thumpih ni.
 6. Semtute'n Toupa apan Khasiangthou thopna hon tanzel theihna ding uleh kipiakna thuksem toh Toupa it bang a khamangthang dingte itna tak toh kuhkal sem a hon septheihna ding un thumpih ni.
 7. Himalayan Missions Field ah semtu eilam apan kuan (CCM) mi-16 leh a gammi 37, agawm mi-53 te'n Pathian apan sapna kichian sem leh kipiakna thuksem toh khamangthang dingte zonkhiakna nasep kuhkal zawsem a hon sepzom theihna ding un thumpih ni.
 8. Semtute'n a houlimpih khak uh mite lungtang ah Toupa Kha in thu a gen a, a lunglutlou leh lungtang khauhte a lunglut ua, Khrist a hondampa ding ua hon santheihna ding un thum ni. Tua ban ah, semtute'n a houlimpih theih ding uh mi a hunhun a Toupa'n a piakna ding in thum ni.

B. DHEMAJI MISSIONS FIELD

KIPAHTU GENNA LEH THUMNA DINGTE:

1. Toupa'n field a semtute sepna tungtawn apan gingthak nih; EBCC Namgharia apan Mrs Chehenu Pegu leh Mrs Debolota Doley-te hon piakziak in kipahtu gen ni. Amaute baptisna piak theih a omta ahihman un kipahtu i genkawm in, maban a khalam kalsuanna ding uh thumpih ni.

2. Field a Study Centre omte Pathian ompihna toh lamzangtak a paithei zel kipahthu gen ni. Study Centre a kai khenkhatte Pathianni chiang in biakkhawmna hun ah va kihelthei zel uh kipahthu gen ni.
3. Hostel-cum- Training Centre a semtute'n a kep uh Mr Roktim Doley, kumkhat hostel a om nung tu in Grace Bible College, New Lamka ah Laisiangthou sin in omlel hi. Kipahthu gen in, tu Semester apan Diploma in Theology sin pan ding ahihna ah, lamzangtak a hon sintheihna ding in thumpih ni.
4. Toupa'n gingu Pathian gam nasep a lunglut honpiakte ziak in kipahthu gen ni. Amaute'n semtute Ministry ah huh in panpih thei zel ua, a kipiakna uh thupi i sa hi. Toupa'n amaute a vualzawl a, tunung a field a ding a khuam muanhuai hong suahna ding un thumpih ni.
5. Field a gingtute lak ah thilpiak peding mi Toupa'n hon piak zelte ziak in kipahthu gen ni. Maban a gin omtak a thilpiak hon sutzop ua, tamsem thilpiak petu ding hong kibehlapna ding in thum ni.
6. Garhpara a i saptuam mi, Balim Taye leh Tilak Taye-te a Pa'un a kikhop ding uh dalsek hi. Hundang ah tuabang a khamlou a zalentak a kikhawm thei zel himahle uh a Pa'ua pan khamna omziak in haksatna tampi tuak uhi. Maban a zalentak a a kikhop theihna ding un Pathian in a Pa uh Ganesh Taye lungsim a thu a genna ding in thum ni.
7. Namgharia a om nungak Rangoni Pegu Nurse zillel taksa chauh ziak in damlou in hun bangtan hiam apan om hi. A hong damsianгна ding leh a nurse zilte chidam a sutzop theihna ding in thumpih ni.
8. Pathian in thumtute thumna hon vuaksuaksak lou in, i na thumpih uh lupna ngak a om gingu Binima patir, Rani Patir, leh Geeta Kutum te'n damna ngah in biakna kikhopna ah kiheltheita uh, kipahthu gen ni. Maban a chidamna hoihtak toh kal hon suanzel theihna ding un thumpih ni.

9. Semtute'n Pathian thu a houlimpih uh mimal leh innkuan bangzah hiam omlel hi. Amaute'n Jesu Khrist a hondampa ding ua hon saantheihna ding uleh amaute semtute'n houlimpihna a sutzop zel theihna ding un thum ni.
10. EBC Pastor Candidates a omte'n June khasung field a Field Exposure a neih uh chidam leh lamzangtak in zouta uhi. Amaute'n Field exposure chidamtak in zou mahle uh maban kalsuanna ding saupi neilai ahihman un thumna toh delhzui lai ni.

D. HOJAI MISSIONS FIELD

KIPAHTHU GENNA LEH THUMNA DINGTE:

1. Hojai Missions Field nuai a semtu mi 5te'n Toupa ompihna toh lamzangtak in semthei zel uhi. Khua hun kikhekziak a nawngkaina omlou a, semtute'n Pathian kha ompihna toh a septom theihna ding un thumpih ni.
2. Hojai station ah Naupangte lakah tuition tungtawn a i sepna sutzop in om thei nawn a, naupang 20 vel kihel thei uhi. Naupangte lak a khat in Assam Board apan Class-X zou hi. Kipahthu gen in, naupangte lak a tanchinhoih chi tuh a hihtheihna ding in thum ni.
3. Mr. Mani Singha, semtute'n Pathian thu houlimpihna nei uhi. Jesu hon theihchet sem a, hotdamna kichiantak a muhna ding in thumpih ni.
4. Evan P Lokeshwar Singh leh Evan Vungngaihnuam-te Lanka Station thak ah chidam a lut in, nasep panta uhi. Munthak ahihna toh Pathian makaihna leh ompihna toh gahsuahtak a hon sep theihna ding un thumpih ni.

E. GOALPARA MISSIONS FIELD

KIPAHTHU GENNA LEH THUMNA DINGTE:

1. Khohun kikhek ah semtute leh inkuante Pathian in chidam in hon kepsak a, maban kalsuan zomthei zel ahihman un kipahthu gen ni. Semtute'n houlimpih leh lawmbawlsa a

neihte uh a poimoh bang a amaute lak a kal hon suanzom theihna ding un thumpih ni.

2. Community Health Care Project nasepna buaina omlou a lamzangtak a sep a hihtheihna ding in thum ni. Maban a agam mi tampite sukkhak hong hih ua, hiai Project tungtawn a ginglou mite lak a tangthupha puanzak ahihtheihna ding in thum ni.
3. Semtu Evan NK Naulak, a kal a suang omziak in taksa hatloutak in omlel hi. Pathian hihdamna poimoh ahihman in, damna hoihtak hon ngahna ding in thumpih ni.

F. KAMRUP DISTRICT

KIPATHU GENNA leh THUMNA DINGTE

1. Evan Thangbiaksuan, Boko, Bamunigaon Station leh Evan Kamkhenthang, Dhupdhara station a semtute'n Pathian ompihna toh tangthupha lamzangtak a hon tangkoupih ua, amaute tungtawn a gingtu piak a i omna ding in thum ni.
2. Loharghat station a i sepna mun ah Toupa'n khamangthang Mr. Ranjit Rabha leh a innkuante banah Miss Krisna Rabha hon pia kipathu gen ni. Loharghat Station ah tulel in, Evan M Daizachin leh innkuante'n semlel uhi. Toupa'n station a i lutna sawtnaikei mahleh semtute kalsuanna leh thumtute thumna hon dawng a, gah muh theih ding hon piakziak in kipathu gen ni. Toupa'n hon piak gingthakte khalam kalsuanna ding thumpih ni.
3. Mrs. Purnima pasal leh innkuante a ding in thum ni. A lungsim ngaihtuahnate uh Pathian in hon kheklamdsak a, a zi Purnima ginna a koppih theihna ding in thum ni.
4. Field a semtute leh a innkuanpihte uh lak ah a chang in taksa hatlouna leh damlouna tuak omthei zel uhi. Hatlouna tuamtuan neite ban ah taksa damtheihna tasam mahmah a omte'n Pathian apan damna a ngah chiat theihna ding un thumpih ni. ■



DORCAS *Corner*

Pathian hehpihna ziak in kumkim masa zangzou in July kha pitung in i om nawn a, kipahhuai i sa hi. Simtute makai Lian Hondampa Jesu Khrist min in itna chibai k'on buk hi.

Amah akipan pumpi tengteng kizopna chiteng sep ziak a lemtak a suktuah leh kizomkhawm a, hiang chih in sep dingdan bang a sep Chiang in pumpi a khang a itna ah amah leh amah a kilamtou hi (Eph.4:16).

Laisiangthou a thupi thilhihthei tak, kithutuak a omkhawm a poimohna genchetna hoihpen tuh kipumkhatna ahi. Laisiangthou thu tungtawn a i kipumkhat theihna ding in:

1. **Jesu Khrist ah kibulphuh na:** Jesu Khrist ah i ginna kiptak a a kibulphuh ding Pathian deihdan ahi. Saptuamte dinsan leh kingakna tua Jesu Khrist mah ahih ding ahi. Huai ah tuh lungsim chidam a kithutuak in kipumkhatna a kipsak hi. Jesu Khrist kia ah ahi gingtute gawmkhawm a om in, amah ginna ah gakkhawm in i om a hon kipumkhat sak hi. Khrist Jesu ginziak in Pathian tate na hivek uhi. Noute Khrist Jesu a baptist lut a a omsate Khrist in na kithuamta uhi (Gal.3:26-27). Jesu Khrist tungtawn in Kha Siangthou in gingtute Pathian tate hon suaksak a hon kinaisak, hon pumkhat sak in hon hatsak hi.
2. **Hiang tuamtuam kipumkhatna:** Mihing pumpi in hiang tuamtuam tampi kituaktak a nasemkhawm a neih bang in, saptuam pumpi in leng na thupi taktak lam chi tuamtuam in kipumkhat in a sem hi. Sapum i chih khat ahi a, hiang a nei a, sapum hiangte tengteng, tam mah le uh, pumpi khat a hi a; Khrist huchibang mah ahi (1Kor.12:12). Hiang peuhmahte septheih tuamchiat, amau mohpuakna bangbang ginom a a sep Chiang un, pumpi chidam leh khan

ding bang in a khang hi. Huchibang in Khrist sapum leh a hiang ei gingtute Pathian in saptuamte lak ah i hihtheihna lam chiat a pumpi lamtou a khang ding kipumkhat ding in hon deih hi. Khepek in, 'khut ka hihlough ziak in sapum a pang ka hikei' chimahleh sapum a panglou ahituan kei hi. Huchibang zel in hiang khat in hiang dang khat hihna a simmoh saktei tuan kei hi. Huchih naksang in hiang khat in a thuak leh hiang tengteng in a thuakpih zaw hi. Tuabang in hiang khat pahtawi a om leh hiang dangte'n a kipahpih zel uhi. Huaiziak in, Khrist sapum leh a hiangte amah itna toh kipumkhat in A na sem ni.

3. ***Pau chikhat a kipumkhatna:*** Penticost ni a hong tun in gingtute' omkhawmna in ah Kha Siangthou in amaute a luahdim vek hi. Huchiin Kha in a pausak bangzel in gam tuamtuum akipan pau chituam chiat himahle uh, khat leh khat kitheisiam in pau chikhat a mau pau bang chiat in a za ua, a theisiam vek uhi (Nas.2:1-11). Kha Siangthou in gingtute pau leh sese ngailou in a gen peuh uh kitheisiam in Pathian nasep thupidan gen in a houlim uhi. Saptuam chidam leh hattak a khanna ding in a poimohpen Kha Siangthou tungtawn a kipumkhatna ahi. Tua Kha Siangthou tungtawn mah in Peter in hangsantak in Pathian thu gen a, huai ni in mi sangthum vel gingtu kibehlap hi. Banah gingtute lungsim munkhatpu in om ua, neihteng kikop in Pathian biakin ah phatuamngai tak in om ua, lungkim in a an uh a ne zel uhi (Nas.2:44-46).

Laisiangthou thu tungtawn a kipumkhatna khotang a pawlpi bang lel hilou a, Khrist a kibulphuh a amah toh hinna kizom a hingkhawmte ihi. Gingtute sapumkhat bang a i hong omkhawm Chiang in Pathian deihna bang in na thupi tak semkhia in inkuan, saptuam leh khovel theihphak tan ah Khrist itna thu thehzak in om hi. Huai mah tuni a lunggulh in Laisianthou sim in mimal chiat a thu hinpah in kipumkhatna lenkip chiat ding in Toupan hon vualzawl hen.

DORKA PAWL PROJECT:

Dorced tungtawn a naupang sponsored Class X & XII Board Examte Result hiai anuai a bang ahi. High School Leaving Certificate (HSLC) – 2024 (Class – X)

| <i>Sno</i> | <i>Min</i> | <i>Result/Div</i> | <i>School Name</i> |
|------------|----------------|-------------------|--------------------|
| 1 | Ginmuanlal | Pass/5.00 | Ebenezer Academy |
| 2 | Lalthansang | Pass/5.83 | Ebenezer Academy |
| 3 | Chinglunkim | Pass/6.17 | Ebenezer Academy |
| 4 | Kunglawmsang | Pass/6.50 | Ebenezer Academy |
| 5 | Niangngaihlian | Pass/6.67 | Ebenezer Academy |
| 6 | Niangnunmawi | Pass/6.00 | Ebenezer Academy |
| 7 | Chingparmawi | Pass/ 5.83 | CEHS, Sinzawl |
| 8 | Chingliankim | Pass IInd Div. | MES, Mimbung |
| 9 | Kimremsiam | Pass IInd Div. | MES, Mimbung |
| 10 | Zothanpar | Pass Ist Div. | EA, Teikhang |

Higher Secondary School Leaving Certificate (HSSLC) Class – XII)

| <i>Sno</i> | <i>Min</i> | <i>Division</i> | <i>School Name</i> |
|------------|-----------------------|-----------------|-------------------------|
| 1 | Paumuanmung | 1st Division | Ebenezer Hr/Sec. School |
| 2 | Thangngaihsiam Lethil | 1st Division | -----do----- |
| 3 | Jenny Tanparmawi | 2nd Division | -----do----- |
| 4 | Ginthiansiam | 2nd Division | -----do----- |
| 5 | Mangvanglian | 2nd Division | -----do----- |
| 6 | Muanlianlal | 2nd Division | -----do----- |
| 7 | Pauminlun | 2nd Division | -----do----- |
| 8 | Chiinkhawlkim | 2nd Division | -----do----- |
| 9 | Kimmuansang | 2nd Division | -----do----- |

HSLC Exam mi 11 lak ah 10 in passed ua, khat in fail hi. HSSLC Exam mi 9 ten passed vek uhi. Amaute lohchinna tungtawn in i sepgimna te uh Toupa ah a thawn ngeikei chih i muh ziak in thupina tengteng Pathian in i pia hi.

DOTPROJ a puankhui sinte'n hoihtak in sin tou thei zel uh, kipahtu gen ni. Puanak design na deih dandan hon khui sak thei ding uh ahi. ■



YOUTH *Corner*

APBF Youth Conference 2024 Khawmpi Report

Kum 5 hal a omzel, Asia-Pacific a Baptist tuailaite khawmpilian, Asian Pacific Baptist Youth Conference kichi, Malaysia Baptist Conventiente'n May 29 apat June 1, 2024 sung Bayou Lagoon Resort, Malacca City ah hon zintun uhi.

Tutung ei saptuam apat in mi li (4) va tel din kisa ua, amaute - Rev. V. Thangkhanmuan (Youth Coordinator), Rev. M. Ginminthang (Child Coordinator), Pastor M. Thangkhenmung (Local Pastor, EBCC Kanaan East) leh Mr. Lalmangaih Hauzel (EBCC Bengaluru) ahi uhi. Hiai teng lak ah kei kia khawmpi siim khathei in ka om a, adangteng bel Cyclone Remal ziak in Lengpui Airport ah taang in amun hong tungzoulou uhi.

Khawmpi thupi ahihleh Kolosate 3:16 apat lakkhiat, "BE" Authentic, "BE" Passionate, "BE" Connected and "BE" Saved chih ahi. Hiai khawmpi hun ah atung a thupite zang in keynote sessions li vei om a, huai hun ah thugentute leh a thulute uh hiai bang ahi: Pastor Karen Wilson "Be Connected" "Be Influential"; Pastor Ronnie Chiu "Be Passionate"; Pastor Danushka P. "Be Authentic"; Rev. Steve Dixon "Be Saved"; Mr. Kethoser K. "Sent Out to be Salt and Light."

Family group chih minvuah in gam tuamtuam apat mi 10-20 kikal group khat ah a hon gawmkhawm ua, nitak teng in sharing leh kithumpihtuahna hun bang, kilawmbawlina hunte bang in ka zang zel uhi. Workshop leh Off-limits chih minvuah in a neuzaw deuh a Khristian tuailaite hon sukha, thulu tuamtuam seminar/workshop dan pian in hun li (4) mah kinei a, hiai thulute mah ei saptuam sung a le genkhawm touhtouh di'n hoih ka va sa vek hi.

Pathian honpina lamdangtak tang in, Faith Response to Fake News & Conspiracy Theories seminar a resource person, Evangelist Kwame Adzam (Billy Graham Evangelistic Association a training zou, tua London a omlel) tawh ka kihoulimna tungtawn in amah workshop a hong tel a, I saptuam leh I mi leh sa naktak a thudiklou in hon sukkhak dan, Manipur viral video ziaak a I nute leh numeite'n bawlsiatna a tuahte uh genkhiatna hun zang di'n ahon chial hi. Thudikloute ziaak a mimal khat kia hilou a, nam khat, saptuamte leh gamsung tanpha sukha ahihdan kava gen a, a hong tel teng tawh bang thumkhawmna hunte ka zangkhawm thei uhi.

Khawmpi palai ki register teng 650 vel pha a theih ahi. Asia leh Africa gambup apat gam tuamtuam 30 vel apat in palai kipaikhawm hi.

2027 tan daih ding ABPY heute dia telchingthakte anuai abang ahi.

- President : Rev Steve Dixon, Australia
- Vice President : Upa Jacob Vanlaltana Khiangte, India
- Secretary : Ireina Ruth, Indonesia
- Treasurer : Lakna Premawardhane, Sri Lanka
- Executive member : Lee Tomas, Philippines

Hiai khawmpi sung a APBY heutute'n Missions nasepna dia tupna goltak a puankhiat uh ahihleh, tu apat kum 15 sung a Baptist tuailai mi Lakh 20 short-term cross-cultural mission trip a tel dia chiil leh sawlkhiat di chih ahi (#apby2mil).

APBY a heutute hileh, Baptist Convention tuamtuam apat gingtu hihpihte lawmbawlina hun (networking) manpha tak va kinei thei hi. Hiai lawmthakte zatphattuam a ei Saptuam vai a khalam khantouhna hon tunthei di, naupang leh tuailai issues-te bang, abiktak a Missions lam a sepkhawm didan kikuptouh a sepkhiat theih kal ngaklahhuai ka sa mahmah hi.

Thupina tengteng Toupa kia in tangta hen.

Report petu:

- Lalmangaih Hauzel, EBCC Bengaluru





CHILDREN'S *Corner*

LAI SIANGTHOU: PATHIAN THUTAK

THUPATNA: Tulai khovel ah buaipih ding a tam mahmah hi. Hohna ding, sep-le-bawl ding, annék khopna ding, phone khoih hun ding, leh vai tuamtuam a tam luat ziakin kuapeuh eimah khom chiat ah buai vingveng chiat in i om hi. A hoih lam a gen di chi lehang, hiaibang a i buai vingveng khawng mah tuh poimoh i hihna hon sulangtu ahi leng chih theih hi. Himahleh, hiai banga i buainate'n khalam i kikepna (mimal/inkuan) ah hon niamkiak sak hiai-hiai ahikhak ding kivenhuai mahmah hi. Huchi bang kawmkal ah tuni in, Laisiangthou sim a, theih a, zuih a poimoh dan saulou i gen ding.

KALSUANNA DING AH VAK PETU: LAI SIANGTHOU

Damsung hun zatdan ah naupangte tuh pichingte sang a hun sauzaw zangthei lai ding a i lamet-te ahi uhi. A hinkhua uah thil tapi, haksatna, nopna, lunglenna, khasiatna, buaina, leh a dangdang a phut ding uh omlai hi. Hiai bange ahon phutkhak Chiang ua, a hikhelhel louhna ding un leh, Pathian deihna banga a hunhun a tunglam pilna toh amau adia thupukna dik a lak theih uh a poimoh mahmah hi. Huai hihtheihna tuh, khovel in a piak siamna leh theihna apan a neih ahikei a, tunglam apan pilna, A sikha Joseph, Daniel, David-te kiang a Pathian in a piak bang pilna neihna ah a om hi. Huai dingin Laisiangthou a sim ua, a theih ua, Pathian deihna lampi a muhtheih uh poimoh hi. Pathian deihdan leh hoihsak lampite Chiangtak a a muh theihna ding ua vakna petu tuh thildang hilou in Laisiangthou ahi. Laisiangthou in “Na thu ka khe ading in khawnvak ahi a, ka lampi ading in vak ahi” achi hi. [SAM 119:105]. Hih ding leh hilouh ding, nek leh nek louh ding, gen leh genlouh ding banah hih dingdan leh hihlouh dingdante, a

theihkhen theihna ding ua vakna/pilna petu Laisiangthou/Pathian thu ahi. Tulai khovel ah ‘hin dingdan’ theilou i tam luat ziak in, i kongzingte, i insungte buai thei mahmah hi. Huai banah, nek-ledawn a siangthou louhna, numei-pasal kal a siangthou louhnate in i khotang hihbuah mahmah mai hi. Naupang chikchik tuabangte a kibual in, zumhuai ahihnam leng phawklou, khonawl khopam peuh a om maimahte khawng Pathian mitmuh ah kihhuai mahmah ding hi. Tuabangte apan i suahtak theihna ding zaw, a hunlai a Pathian thu sinsak ding leh Pathian deihna lampi muhsak ahi. Sam laibu in “Valnou in, bangchi’n ahia a omdan a hih siangthou ding? Na thu bangzel a a omdan venghoih in.” a chi hi. [SAM 119:9]

HINKHUA KHENG LAMDANG THEI: LAISIANGTHOU

Laisiangthou kichi Pathian thutak kigelhna laibu ahi a, huai thutak in thil a hihthei a, mihing hinkhua a khenglamdang thei hi. Sawltak Paul in Timothi kiangah “Pathian thu a hinga, thil ahihthei a, namsau hiamtuah bangchibang sang in a hiam a, hinna leh kha, guhlawi leh guhngkek tuamkhen hel khop in a sunthei a, lungtang a ngaihtuah leh tupte a theipah thei hi.” [HEBRUTE 4:12]. Naupangte’ a ding biik in genle, Bible tang etlouh a theihsak kichi bang tuh thil poimohtak ahi. Insung a Nu-lepate banah piching khatpeuh inleng sinsak theih hi. Huai banah Laisiangthou sunga mithupite (Abraham, Kaina, Abel, Joseph, David, Daniel leh a lawmte leh a dangdang) hinkhuate simpih in i hilh thei uhi. Huchi banga, neu apat ana theih Pathian thute in, tu-le-tu kia hilou in, a denching hun ding uh bawlhoih thei hi. Hiai banga Laisiangthou thu kisinsak, etlouh a theihsakna ding hun leng peman nawnlou a buailua ihih khak ding thil lauhuai pi ahi hi. Tulai khovel ah, naupangte lakah thilhoihlou sel zoh vual ding hinawnlou hi. I vanzatte hoih gawp a, ei sang mah a leng theizaw uh ahih manin, thil hoihlou pipi leng ana muman sek uhi. Huchi bang a thilhoihloute a tuahkhak hun ua, amau lungsim leh ngaihtuahna a hong kilang thei ding Pathian thu-lelate a theih uh a poimoh hi. Huaziakin, Pathian thu in thil ahihthei a, i tate maban ding hon bawlhoihsak thei ahi chih thei kawm in Laisiangthou thute sinsak, theihsak leh zui dinga hanthawwna i piak a poimoh lua hi.

THUKHITNA

- Laisiangthou a kigawm in laibu 66 a pha - Thukhun lui bu 39 leh Thukhun thak bu 27 ahi.
- Laisiangthou tuh khovel a laibu kisunkhe tampen, kizuakkhe tampen leh kisim tampen ahi.
- Bible Society of India tungtawn in 1971 kum in Paite pau in Laisiangthou kisunkhia hi.
- Leitung ah pau chi tuamtuum 7388 vel om a, nam tuam dana kihui thei (people groups) 17,428 vel om hi. Pau 724 in Laisiangthou bukim kisunta a, pau 1617 in Thukhun Thak kisun, pau 4837 in Laisiangthou sunga bu khenkhat hiam, ahihkeileh, a themthem hiam in kisun phet hi. Mahni pau a Laisiangthou ginataka nei nailou leitung ah minam 2000 vel omlai hi.

(Source: Pathian thu kidawng Kum 1na: EBC Sunday School, Beginner A Sinlaibu). ■



EBC Innsung Thu

LRRC - LAMETNAMUN ADMISSION TOH KISAI THEIHTUAK:

Lametnamun a kikem dia lut utte a sungkuante uh khat bek tel in Pre-Admission Counselling bawl masa in, amaute Waiting List a koih in kha thak a seat awng omzah pansan a waiting list te aban a kisam ahihman in, Tualsung saptuum apan kikepman piaksak dia hong kisawlte hong pai hun ua laklut geihgeih lemtang lou kha thei ahihman in theisiam ding in i kingen ahi.

Maban ah huchi bang om tou zel lai dia lamem i hihman in, hong ki-ngen pen (mimal) leh seat awng dan toh kisai Lametnamun toh kithuzak masak hoih ding hi.

Hq, Division, Tualsung saptuum leh Departmentte banah mimal toh pangkhawm leh lamtuamtuum a kithuahpihna kidongtou zel ahihman in tuabang veina leh thaitna nei heutu leh mimalte tung

ah Pathian min in kipahtu i gen hi. Tu in Lametnamun ah mi 50 (seat full) om lel hi. Tualsung saptuam leh mimal in a piaksak mi 5 om lel hi.

- *Project Officer LRRC* ■

THE 9TH BASIC BIBLE SCHOOL 2024:



Toupa vualzawlina leh makaihna toh, NEBC in kum tenga Saptuam kepna leh kalam kisinsakna dinga poimoh hi a theih ziaka ana

kizang tou zel, BASIC BIBLE SCHOOL kichi, tukum in a 9veina ding in nisim 13 ~ 23, May 2024 sung Nepal singtang tawng a om NEBC Faklung Biakin ah nei zoh ahihtak man in, hiaitan honpi tu Toupa min phat in, huai dinga hon na thumpih Saptuamte tung ah kipahtu kon gen hi.

Hiai hun pen khangthak hong omtou zel dingte leh Saptuam makaitu ding kisektouhna hun poimohtak ahihman in, manpha chihlough theih vual hilou hi. Kumteng a hun lemtang penpen a zatzel, Singtang lam leh Phaizang lam ah hun khat khit hun dang a kisuankual a zat zel ahih mah bangin, tukum in singtang lam tukha ahihman in, Faklung Saptuamten hon zintun ua, min khum mi 41 leh a khumlou a telte toh sim in mi 50val bang kipa thei hi.

Kum tengin sinsaktu ding semtute lak apan kitelkhia in, subject tuamtum, Bible Doctrines, Church Administration, Evangelism leh a dangdang chi 13, sinsaktu mi 13ten sinsakna kipia hi. Saptuamten na hon thumpihnite uh ziakin, Pathian vualzawlina kitang in, hiai hunsung in buaina bangmah omlou in, veng sung hin a telte lak ah hitaleh, thoveng leh lamzang taka zatzoh ahih man in Pathian tung leh noute tungah kipahtu lian mahmah hi.

Sintute leh sinsaktuten Pathian apan vualzawlina tampi tanga, hiai hun a kisinkhiaten gah thupi hon suan a, Toupa gam kekletna

vanzat manpha tak mai a hong hih ding lunggulh a kinei ahihman in, huai dingin Toupa vualzawlna ngen in thumna toh hon delhzui pih zomzel lai ding in leng ka hon ngen ngal hi.

Toupan a Saptuamte hon ching, hon kem in hon ompih tawntung hen aw.

Ka kipak, Field sik in,

- Rev Dr Thangminlun Mangte
Field Superintendent, Himalayan Missions Field ■

EBCC ENPUM CHIALPINA REPORT:

EBCC Enpum in May 18-19, 2024 sung Second Comming “Na Pathiantuak ding in Kiman in. Amos 4:12” chih thupi pansan in chialpina hun zang ua, huai ah thugentu Rev Gin Malsawm, Principal GBC pang hi. Hiai chialpina lohching leh manpha tak in kizou thei hi. Hiai chialpina ding a thumsaktu leh panla kha tengteng tung a kipahtu genna in KTZ ah ka hon taklang uhi. Pathian kia in thupina tang hen.

- Upa Khamzachin, *EBCC Enpum* ■

PUMBUK HON HITTA:

Mission Inn huangsung ah tuailai, NDPN tungtawn a laisim nuamte' pansan ding in “Pastor (L) K. Vumzathang Pumbuk” chi a minvuah, Study Hall ding June 11, 2024 in Rev Dr S Vung Minthang, General Secretary tungtawn in honna leh Pathian kiang a latna neih hita hi.



Tulel in hiai mun ah tuailai mi 10 laisim in omlel ua, Evan G. Ginkhenmung in warden hihna toh enkol hi. Pastor (L) K Vumzathang leh a innkuan ten 2006 kum a innmun a neihsun uh Pathian' Missions sepkhiaakna ding a poimoh banga zatding a honpiak khiak uh pansan a kibawl ahi. Toupan thupina tang hen! ■

PAITE STUDY BIBLE PROJECT KIPANTA:

Kum bangzah hiam paita in BSI heutute kiang ah EBC in Study Bible poimoh ahihdan kitun hi. Tua hunlai in Paite Bible correction pailael ahihman in tua pen zoupnot ding in hon theisak uhi. Huaipen zoh ahihtoh kiton in report kibawl a Bible Society of India (BSI) in Paite Study Bible project hon pomsak ua, tua toh kiton in Translation Committee bawl ding hon theisak uhi. CEC in February 14, 2024 in Paite Study Bible Translation Committee bawlkhia hi.

Amaute:

1. Translator : Rev. Dr. S. Vung Minthang
2. Chairman : Rev. Paukhanmang Guite
3. Secretary : Rev. Nenglian Vualnam
4. Members
 - i. Rev. K. Kamchinkhup
 - ii. Rev. Thawndoulian
 - iii. Mr. N. Thangzamang
 - iv. Miss Dr. Niangsangching
 - v. Rev. V. Thangkhanmuan, *Youth Coordinator*

Translation Adviser Dr. Mayi Ajungla in asap bang in Translator in May 20-29, 2024 sung Paratext Installation leh Training Shillong Translation Centre ah va nei hi. Hiai tuh Translation kipatna leng ahi ngal hi. Toupan hiai project manphatak ahon zohpihna ding in saptuam mipiten thumpih zelzel ni. ■

BETH HARAN HOSTEL AH FELICITATION PROGRAM

Beth Haran Hostel a om naupangte Board Exam result suak ah Class X mi 8 leh Class XII ah mi 5 pass ua, amaute kipahpihna program June 9, 2024 in zat in om hi. Hiai hun ah Rev Nenglian Vualnam, Director Development, EBC, Rev Thawndoulian, Director of Ministries, EBC, Rev. Thangbiakmuang Chaplane, Beth Haran, Upa Langsanglian coordinator DD leh Rev Dr S Vung Minthang, General Secretary EBCte kihel uhi. Hiai hun in GS in naupangte hasotna leh thumsakna nei in nitak annekkhawmna nei uhi.

Hiai felicitation program zoh in Beth Haran Hostel extension first floor south wing honna leng General Secretary EBC in nei hi. ■

NDPN SEMINAR LEH COMMITTEE FELLOWSHIP NEIH IN OM



Central Baptist Youth Fellowship panlakna in EBC Singngat Division sung a Tualsung Baptist Youth Fellowship Committee, Singngat Division Baptist Youth Fellowship Committee leh Central Baptist Youth Fellowship in EBCC Suangdoh ah June 14-15, 2024 sung in NDPN (Nekzonna Dohkan Pulpit Nasepna) toh kisai kisinsakna leh Heutu paikhawmte Kithuahkhawmna hun zang uhi.

Sinsaktu in Rev Kamchinkhup, Director of Misisions pang a thugenna Youth Coordinator in zang hi. Hiai hun ah khua 12 apan in palai 90 val leh Central Baptist Youth Fellowship (CBYF) heutute leh DS Singngat Division Team toh gawm in mi 110 val paikhawm uhi. Program manpha leh lohchingtak in zou uhi. ■

KIPAH THUGENNA

Apaita May 05, 2024 ni in vangsiathuui tak in KEK kia in Saptuam quarters leh biakin a solar plate leh batterryte hon densiatsak hi. Athak muan mahmah heutute Lamka South Division leh Dorcas Hall in hon leisak ua, kipaklua ka hihman un KTZ ah kipathu ka hon taklang uhi.

- Upa GS Solomon, *Chairman TBUC, EBCC Tonglon (P)* ■



Ordain Sunna

1. **Min: UPA TH TUALZALIAN**
2. Pianni: February 2, 1949
3. Pianna Khua: Mata Khua
4. Pa Min: (L) Pu T. Lalsiam
5. Nu Min: (L) Pi T. Piangnem
6. Zi min: Mrs. Chingkhodon
7. Kitenni: April 15, 1971, Kitengsak tu: Pastor Thawngluai
8. Gil a gah goutan neihzah: 4 Pasal: 3 Numei: 1
9. Tu melmuh zah: 8 Pasal: 3 Numei: 5
10. Tusawn melmuh zah: 3
11. Tulel a omna Saptuam: EBCC Mata
12. Tulel a kizatna: TBUC Member
13. Ordain Kum: December 7, 1988 Ordain Petu: Rev T Jamkhothang
14. Pahtakna lai san kum: December 8, 2019
15. Toupa kiang a tawldam ni: June 14, 2024, Vui ni: June 15, 2024
16. Vuitu Pastor & Saptuam: Pastor Pauthianmuan, EBCC Mata
17. Natna: Cancer
18. A tanchin dang tomkim:



Lingsiphai L.P. School ah Class V Chiang sim in, 1962-1966 Vungzagen High School, Mata ah Class IX tan, February 16, 1966 in Indian Army Medical Corp. ah lut, 1976 in Service Discharge hi. January 9th 1980 in I.F.C. Department Govt. of Manipur ah Grade IV Sepna mu in, February 28th 2009 in pension hi.

Sepaih ahong pawt a pan in phatuamngaitak in saptuamte toh kithuah in Committee tuamtuam a member in pang a 1984-84 Local Secretary len a, 2003-2004 Local Chairman len a, TMC Chairman len hi. 2005-2007 Local School Committee len hi. Auditor mohpuaknate tanpha piak in na om hi. Khristian Naupang Pawl Simtawp Bial, Division Baptist Children Dept. leh Division Mission Committee ah Member in ana pang ngei hi.

Khotang vai ah: Mata Youth Association ah Adviser, Village Authority ah Member, Talkha Gam Horticulture Co-operative Society ah Chairman len lel hi.

Football leh Gamvak lunglut in, Ngal, Sakhi leh adang tamkhop man hi. Mikizen, khan-le-vual polh siam ahi.

2020 in RAJ Medicity Imphal ah Operation in, huainung anatna hong puangthak hi. September 2022 in Guwahati leh Shillong-te ah ki-enkol in hoih mahmahta hi a kithei in inn lam hong pai hi. January 2024 in omnuamlou in bah hiaihiai a... Doctor rawn zel in inn ah kikem hi. Pathian in akiang a tawldamta ding in June 14, 2024, 2:15pm in a-it angaih teng nusia hi.

Toupa Khasiangthou in a nutsiat a inkuan leh Saptuamte khamuan in makaih zelta hen. ■



Kipahthu Genna leh THUMNA DINGTE

JULY 2024

- 1 **SEPPATNI:** July kha hon musak i biak Pathian kiang kipahthu gen ni. July 1-4 sung ESC in Workers Camp neiding a, Evan Lianding Guite thugenpi in pangding, thumna ah phawk ni. July 2-4 sung CES Songtal in Evangelistic Week zangding a, Rev M Ginminthang, Child Co-ordinator in thugen ding, thumna ah phawk ni.
- 2 **SEPNAWNNI:** Meitei Khristian, Manipur a omte a ding in nakpitak in thum ni. I saptuam mite leh semtute leng hiaibang hun haksa a Khrist leh Saptuam adia gim-om leh muanhuai a hongpanzel theihna ding un thumna ah phawk ni.
- 3 **NILAINI:** July 4-7 sung CBA Tanguam in Chialpi neiding a, Evan T Damkthoang in Pathian thutak gending. Chialpi lohching ahihna ding in Pathian kha pawlna ngen in thumpih ni.
- 4 **NINGANI:** July 4-7 sung EBCC Zenhang Lamka in Nungzuihna Chialpi neiding a, Rev. K. Kamchinkhup, Director of Missions, EBC thugenpi in pangding, chialpi lohching leh gahsuhtak a zoh ahihna ding in Pathian ompihna ngen in thumpih ni.
- 5 **SINTAWPNI:** July 6-7 sung EBCC B Kaljang in Nungzuihna Chialpi neiding a, Evan Lianding Guite in Pathian thutak gending. Khrist nungzui muanhuai sekkiak ahihna ding in thumpih ni. July 6 in EBCC Bungmual Dorkapawl makaihna in Meithai fellowship omdinga, Nu Nemngaih mawi, Dorcas Co-ordinator in sinsak ding, thumna ah phawk ni.
- 6 **KIGINNI:** July 7 GBC day ah Rev. Dr. S. Vung Minthang, GS in EBCC G Mualkawi ah Pathian thutak gen in hun zangding, Rev. Ginmalsawm, Principal GBC in EBCC Tlangnuam Aizawl South ah thugen ding, Pathian ompihna ngen in thumna ah phawk ni.
- 7 **NIPINI:** Tunin EBC Saptuam chih in GBC Day zangding. Bible thu suichetna leh ngaihpoimohna Saptuamte lak a hong khansemna ding in thum ni.
- 8 **SEPPATNI:** Paite Study Bible Project nasepna kipanta, lamzangtak a hong paizom theihna ding in thumna ah phawk ni.
- 9 **SEPNAWNNI:** July 10-13 sung ZCBC Kamdou veng in Naupang Camp neiding a, Evan Lianding Guite thugenpi in pangding. Camp lohching ahihna ding in thumna ah phawk ni.

10 NILAINI: Dorka Pawl project, DORCED nuai a laisimten Pathian lauhna toh hon simtouh zel theih ua, lohchinna honngah chiatna ding un thumpih ni.

11 NINGANI: July 12-14 sung EBCC Songtal in Nungzuihna chialpi neiding a, Evan. T. Damkhotang thugenpi in pangding. Khris nungzui muanhuai sekkhiak ahinna ding in thumna ah phawk ni.

12 SINTAWPNI: July 12 in Lamka North Division in U pate Orientation neiding a, Rev. Nenglian Vualnam, Director of Development, EBC in sinsak ding, thumna ah phawk ni. July 13-14 sung EBC Headquarters leh Baptist Children Department, Lamka North Division pangkhawm in, Lamka North Division sunga om Inter leh Senior pawl Evangelistic Meet omding a, Rev. Ginmalsawm, Principal, GBC leh Evan. Lianding Guite thugen in pang ding uh, Pathian kha ompihna ngen in thumpih ni.

13 KIGINNI: July 14 in Rev Thawndoulia, Director of Ministries in EBCC Peniel ah thugenna hun zangding, thumpih ni.

14 NIPINI: July 16, 2024 in EBCC Thingkangphai in Saptuam kum nih chinna leh Pathian kianga kipahtu genna hun zangding a, Rev. Dr. S. Vung Minthang, General Secretary in thugenpi hihna toh uapding, thumna ah phawk ni.

15 SEPPATNI: July 15-26 sung Malaysia ah Haggai Institute saina in, Haggai Leadership Experience khawmpi/training omdinga, Rev. K. Kamchinkhup, Director of Missions, EBC vakihel ding. Pathian ompihna leh makaihna ngen in thumpih ni.

16 SEPNAWNNI: July khasung in Saptuam school-ten Evangelistic week zangchiat ding uh. Naupangte lak a tanchinhoih chi diktak hong kituhna ding in thumna ah phawk ni.

17 NILAINI: DORCED nuai a Class-X leh XII pass ten maban lohchingtak a hon sutzomzel theihna ding un thumpin ni.

18 NINGANI: July 19-21 sung EBCC Lamzang in Naupang Hotdamna Chialpi neiding a, Rev M Ginminthang, Child Co-ordinator in Pathian thutak gending, thumna ah phawk ni.

19 SINTAWPNI: July 20-21 sung EBCC Vaikhotlang in Nungzuihna Chialpi neiding a, Rev Nenglian Vualnam, Director, Development thugenpi in pangding, Pathian Kha pawlna ngen in thumpih ni.

20 KIGINNI: DOTPROJ nuai a puankhui zilna hoihtak in paitheizel, kipahtu gen in, sintute leh sinsaktute a ding in Pathian ompihna leh makaihna ngen in thumpih ni.

21 NIPINI: Manipur Missions Field a semtute leh gingtu omten a ginna uh hon letkip paisuak ua, ginglou mite lak a Khrist adia theihpihtu muanhuai leh etton tham hong hihna ding un thumna ah phawk ni.

22 SEPPATNI: Saptuam school a semtute zatding Training Curriculum bawlina pailen, lamzangtak a zoh ahihna ding leh Pathian in semtute leh naupangte a dinga manphatak a hon zatsakna ding in thum ni.

23 SEPNAWNNI: July 24-28 sung EBCC Teikhang, Mizoram in Pasal Camp neiding a, Evan. T. Damkothang thugenpi in pangding. Khasiangthou pawlina ngen in thumpih ni.

24 NILAINI: July 25-28 sung Convention English School, Lungchin in Evangelistic Week zangding a, Evan. Lianding Guite in Pathian thutak gending, thumna ah phawk ni.

25 NINGANI: Nekzonna Dohkan Pulpit Nasepna (NDPN) nuai a UPSC-civil service exam dia kisa Delhi mun a omte a ding in Pathian makaihna ngen in thumpih ni.

26 SINTAWPNI: Saptuam pumpi a Tualsung Departmental Committee in year plan a neihte uh phatuam leh gahsuhtak a sepsuah ahihna ding in Pathian pina leh makaihna ngen in thumpih ni.


27 KIGINNI: NDPN nuai a coaching kai leh training a omlelten lamzang leh manphatak a honzoh chiat theihna ding uleh July 28 in EBCC Central Lamka in Haithak Programme zang ding uh, hiai hun ah Rev. Ginmalsawm Principal GBC in thugen ding, Amaute Pathian ompihna leh makaihna ngen in thumpih ni. July 28-Aug 4 sung ATA Evaluation teamten GBC hong vel in seminar hong neihiph ding uh manpha leh gahsuhtak a neih a hihtheihna ding in thumna ah phokni.

28 NIPINI: July 29-31 sung CES Thanlon in Evangelistic Week zang ding a, Rev. M. Ginminthang, Child Co-ordinator, EBC thugenpi in pangding, Pathian Kha thopna ngen in thumpih ni.

29 SEPPATNI: July 30-August 3, 2024 sung EBCC Vengnuam in Tuailai Camp neiding a, Rev. K. Kamchinkhup, Director of Missions EBC leh Evan. T. Damkothang thugenpi hiding uh, lohchingtak a zoh ahihna ding in Pathian kha thopna leh ompihna gen in thum ni.

30 SEPNAWNNI: Pathian louma a partnership a i sephkawmpih, FMPB, IEM, OMF, SIM leh WEC-te ziaka kipahtu gen in, zazaw sem leh lamzangsem a i sep theihna ding in Pathian mai a kun in thum ni.

31 NILAINI: I nam makaite a ding in Pathian ompihna leh makaihna ngen in, lungpi geltak a ma honkaih theihna ding un thumpih ni. Tukha tawptan honpi Pathian kiang ah kipahtu gen ni. ■



BOOK POST

Postal Regd. No. MNP 07 | Regd. No. 22344/70

If undelivered, please return to

The Editor,
CHRISTIAN THUKIZAKNA
P.O. Box-6, Dorcas Hall,
New Lamka-795006, Manipur, India



Edited & Published by Rev. Dr. S. Vung Minthang for the Evangelical Baptist Convention
Designed and Printed at Convention Book House, Dorcas Hall Campus, New Lamka - 795006